

MME AKPATRE USEN

1 Nwedi Timothy 4:1-9; 2 Nwedi Timothy 3:1-7.

ỌYỌHỌ UKPEP-ŃKPỌ 414

Eke Ikpọ Owo

IKỌ IBUOT: “Edi Spirit eneñere ọdọhọ ete, ke ukperedem ini owo eyefiak edem ekpọñ mbuotidem, enyuñ ekpañ utọñ enọ mme spirit abiaña ye ukpep-ńkpọ mme demon” (1 Nwedi Timothy 4:1).

I Edifiak Edem Mkpọñ Mbuotidem

Spirit ọnọ ntọt ete ke ndusuk eyefiak edem ekpọñ mbuotidem, 1 Nwedi Timothy 4:1; 1 John 2:18, 19.

Mbon mfiak edem eda mme ukpep-ńkpọ demon ye mme abiaña ekpuhọre ye akpanikọ, 1 Nwedi Timothy 4:1, 2; 2 Nwedi Timothy 4:3, 4.

Ekpono mbet owo ekan nte ekponode mbet Abasi, 1 Nwedi Timothy 4:3-5; Mark 7:6-8.

II Utom Ọkwọrọ-ikọ Abasi

Ikọ mbuotidem ye eti ukpep-ńkpọ edi se enyenede ndikpeme ke iso nditọ ete, 1 Nwedi Timothy 4:6.

Eneñere etiñ ebaña edinen-ido, 1 Nwedi Timothy 4:7-9; Titus 2:12.

III Ndiok Eyo

Kpukpru oruk idiok-ńkpọ edi idiọñọ akpatre ini, 2 Nwedi Timothy 3:1-4; Matthew 24:37-39; Genesis 6:5-7.

SE EKPEPDE EBAÑA

“Edi Spirit eneñere ọdọhọ ete, ke ukperedem ini owo eyefiak edem ekpọñ mbuotidem, enyuñ ekpañ utọñ enọ mme spirit abiaña ye ukpep-ńkpọ mme demon, emi mbon nsu, eke esit mmọ odorode ufiọn, edade mbubik ekpep.” Nkpọ kiet emi Paul, owo-mbet eneñerede ada nte idiọñọ akpatre ini edi edifiak edem mkpọñ mbuotidem: edikañ Abasi ofuri-ofuri, edkpọñ usuñ, edisin akani usuñ ofuri-ofuri. Eyo mbon Laodicea edi akpatre eyo Ufọk-Abasi ke isoñ ndien eda mmeme efiok emi, kpa edinam eke ayatde Abasi esit. Abasi ọkọdọhọ ete “Akpakam afo ebit, midighe ofiop.” Yak nnyin ikpeme mbak idikabare ibit ke spirirt ke akpatre ini emi.

Ọfọn nditim ńkere se spirit etiñde ọnọ mme ufọk Abasi ebe ke Ikọ Abasi. Ikọ Abasi edi se enọde ebe ke Spirit Abasi. Emi edi ntak eke Ikọ Abasi enyenede uwem. Ikọ Abasi ananam ńkpọ, onyuñ ọsọp, okim abahare ukpọñ, ye spirit ye ikek ye ndia ọkpọ eke spirit ye eke ikpohidem.

Ukpọñ Eke Mikpaha

Ekebot owo ke mbiet ye uduot Abasi. Ke ini Abasi ọkọduokde ibifik uwem esin ke owo, enye akabare edi ukpọñ eke odude uwem. Enye akakabare odu uwem ke spirit ye ke ikpohidem. Mme unam, inuen, iyak, ye kpukpru mme ńkpọ emi ekebotde enyene ukpuhọre ye owo. Owo ekedi se Abasi okobotde saña-saña, se ebotde emi enyenede ukpọñ emi midikpaha. Nso utọ ubọñ! Edi se nte owo esuenede ifet eke enye akpadade anam akpaniko onyuñ anam ńkpọ ọnọ Abasi.

Mme spirit abiaña ye mme ukpep ńkpọ demon ekeme ndibe nduk ke owo nnyuñ nam utom ke ńkari usuñ, ke ndibe man atap, abiaña onyuñ oduri enye efep man oto do, enye ekpewaha ọkpọñ uduak eke Abasi ekenyenede abaña enye ke abaña nsinsi uwem. Do ndien ke enye okut idemesie, nte ikpikpu, edi ubuene, andiduọ nsine ke abiaña andidiok, owo mfiak edem emi ama ọkọkpọñ mbuotidem, Abasi ama onyuñ esin enye. Abasi ama etetiñ ete ke mme spirit abiaña emi eyebiaña ndinen owo edieke ekemedede. Yak nnyin itim ikere ibaña mme ńkpọ emi.

Ńkpọ Idiọñọ

Nnyin ikot ke ikọ Abasi “Edi fiọk emi ete ke ndiọk eyo eyedu ke ukperedem ini. Koro mme owo eyedi mme amaidem, ye mme ama inyene; enyuñ ebure idiọk mbure, eseri iseri, esuñi isuñi.” Mme ama idem idighe mme ama Abasi, idighe mme ama mbọhiduñ mmọ, idighe mme andima ndiye ñkpọ eke odude ke utibe erinyaña Abasi, edi kpa mme ama idem mmọ! Menere enyin se ererimbot mfin, nso ke afo okut? Kpukpru se Ikọ Abasi etiñde ewọrọ ewut idem aña aña. Mme owo edi mme andiyoyom, mbon ibuk, mme ama inyene, mme obure mbure.

Emana eke nnyin idude mi edi emana eke ọyọhọde ye mbure. Mme owo ke ebure ebaña utibe edinam ye nkoñ-nkoñ idaha eke otode ke akwa ifiọk mmọ, ebure ebaña ñkọk-ibuoat ye ntim idem eke mmọ ekade iso ndinam mbaña isañ mmọ ke ikpa enyoñ, ye ndiduñre mme utom emi obot anamde ke ata ikpa-enyoñ. Ibat-ibat ñkpọ esuhọ eke owo mifiọkke mfin, edi ke ediyip enyin, Abasi ekeme ndisin ndutime ke ifiọk owo nte Enye akanamde ye mme andibọp Babel.

Paul, owo-mbet etiñ: “enye owo eti ibuoat? Enye andiwet ñwed? Enye eneni eneni eyo emi? Nte Abasi ikanamke ifiọk mbon ererimbot emi akabare edi ndisime?” (1 Ñwed Corinth 1:20). Ke ini ifiọk owo ama okokure, ifiọk Abasi eyesuk okoñ ke nsinsi.

Mme Idiọk Owo

Ikọ Abasi etiñ nte mme owo ke ukperedem ini etiede: “ebure idiọk mbure, eseri iseri, esuñi isuñi, esọñ ibuoat ye ete ye eka, enana esit ekọm, enana uteñe Abasi, enana ima uduot owo; enyuñ ebiat uñwọñ; ema ebiari, eyak idiọk itọñ akan mmọ ubọk, etie obom-obom, enyuñ esua se ifọnde.” Ini ndomo kiet iduhe ke mbuk eset ererimbot eke Ikọ Ñwed Abasi ọwọrọde osu ofuri-ofuri ke uwem mme idiọk owo nte ke eyo emi.

Se ifọnde eke odude ke uduot owo ọshọre idaha eti-eti ke utibe usuñ. Mme nti edu uwem iduhe aba nte ekedide ke akpa; mmọ ke esuhọre. Tim ti, nte Ñwed Abasi ọdọhọde ete ke mme ukperedem usen “ndiọk eyo” eyedi. Nnyin idu ke mme ukperedem ini. Ndiọk eyo mmọ mi! mme owo “ema ebiari” enyuñ esua se ifọnde.” Ini ewe ke ererimbot ọkọyọhọ ye mbukpo ido obukidem ye iseri uwem nte edide mfin emi?

Edieke owo enyenede edu uwem eke ọfọnde ke esit esie, enye enyene ndidi se mmọ eken esuade. Ediwak owo eyetiene otu owo enam se idiọkde, koro kpa oruk oro edi se iwọrọde etop. Edi owo ekeme ndikpak ukpọñ esie nsin ke hell satan ke nsinsi ke nditiene otu owo nnam idiọk. Abasi asasua ñkpọ emi!

Mme Ama Inemesit

Ñwed Abasi etiñ añaña abaña mme owo ke ukperedem ini: “Mme ada owo nnọ mme asua, ye mbon idiọk iwuk, ye mbon ñkohore-idem; mmọ ema mbre ekan Abasi.” Etiñ emi ebaña mme anie? Owo ekededi eke adarade ñkpọ inemesit ererimbot emi akan ima Abasi ye mbet Esie. Ibeheke enye mme odu ke ñka Ikọ-Abasi mme iduhe. Ifọnke owo ndidi enye emi minimke Abasi ke akpanikọ mme anana mbuotidem emi atuahade ye Spirit Abasi onyuñ obiom iyaresit Esie. Ñkukure se enye anamde edi ndima inemesit ñkan Abasi.

Esikpa nnyin idem ndusuk ini abaña mme owo emi efañade eti ido ukpono emi Abasi oyomde oto mmọ, erinin ibuoat ñkere, edinam utom Abasi ke ndisuan uñwana eke odude ke Eti-mbuk; utu ke oro eyeyom enyuñ enam se inemde mmọ esit.

Tim kere esisit baña ñkpọ emi: Nte afo edi andima inemesit ñkan nte amade Abasi? Nso ke afo esinam ke Usen Ọbọñ? Ifañ ke afo esisio ọnọ man emenere enyiñ Christ? Nte afo ke ọnọ Abasi ini fo ye ifiọk fo, ke ọnọ inyene fo ye ukeme fo? Midighe ntre, ndusuk, afo ñko edi ñkpọ-idiọñ ye idiọñ mme akpatre usen koro afo enyenede ima ọnọ inemesit ererimbot akan Abasi.

Enyoñ-Enyoñ Ido Ukpono Abasi

Ke ama eketiñ abaña mme iren owo ye iban mme akpatre usen, Ikọ Abasi aka iso etiñ ke mme ikọ ntem: “Enyene enyoñ-enyoñ ido uteñe Abasi, edi isañake ñkpọ ye odudu eke odude ke uteñe Abasi. Wọñre kpọñ mmọ eke etiede ntem.” Tim duñre mme ikọ emi. Duñre mme idaha fo ke ñkpọ spirit. Mme ikọ emi oto ke Edisana Ñwed Abasi.

Ediwak owo mfin emi enyene enyoñ-enyoñ ido uteñe Abasi, edi ekpa ke ñkpọ spirit. Mmọ eka iso ke enyoñ-enyoñ ido ukpono Abasi edi inyeneke odudu, efaña odudu Abasi emi edemerede owo, emi ọnọde owo uwem, ọyọhọ ye nsin-ifik, mbuotidem, uko ye udọñ ke abaña utom Christ.

Akpa ima mmọ, akpa udọn oro ndikut nte iren ye iban emanade eduk ke obio ubọn Abasi, ama ebe oduk ke esit mmọ oto ke esit mmọ oto ke edibọ eridahado ke idiok-ńkpọ ke mfuhọ ke ido Abasi ama akada itie; edi idaha emi mme abiaña spirit demon ema ebe ndibe-ndibe eduk enyuñ ebiat akpa ima ye nsin-ifik, ye mbuotidem ye mme eti erikpep emi mmọ ekamade. Idaha emi mmọ ifiokke se ekpenamde enyuñ etaba odudu Spirit Abasi, edi mmọ ekasuk eka iso ke enyọn-enyọn ido ukpono ikpọn-ikpọn.

Tim Kpeme

Abasi anam ńkpọ ye mme iren ye iban ke owo ke owo. Enye ayarade uduak Esie ebe ke Iko Esie. Edi edieke Iko Esie ọduode ke ndedebe utọn, owo oro akabare anana ifik ke utom Abasi; ima emi enye enyenede ọnọ Abasi akabare okim; enye ọduok nsin-ifik esie ke ndiyom obio ubọn Abasi. Edieke idaha fo etiede ntem afo ekpenyene ndifiok nte ke ńkpọ eneñere ọdiok. Ndien afo ekpenyene nditim mkpeme mbemiso ini ebe.

Abasi akpan nnyin, kiet kiet mme ke otu, ndiduo nsine ke Spirit mfiakedem emi ofukde ufok Abasi obukidem, kpa ufok-Abasi eke ananade iwuk, ke mme akpatre usen emi. Yak nnyin ikuduok mfon oro, nsin-ifik, ye ọkpọsọn udọn nnyin ndiyak kpukpru nnọ ke ntak Christ. Yak nnyin inam utom inọ enye ye ọkpọsọn nsin-ifik, inyuñ inọ enye ini nnyin, ifiok nnyin, ukeme nnyin.

Iko Abasi edi akpanikọ; edi ke ini nnyin idibede iduk ke nsinsi ini, mmọ eke mminimke ke akpanikọ mfin emi eyekut ete ke Nwede Abasi edi Nwede Uwem, Nwede Abasi, Nwede emi ebierede se ibanade nsinsi ini owo. Enye edi Nwede eke owutde owo kiet-kiet, iren ye iban usuñ Heaven.

Abasi akpakam emenere esit nnyin! Yak nnyin ikunyime ke baba usuñ kiet, man Spirit ndiok eyo eke nnyin idude idahaemi anam utom ke ukpọn nnyin man oto do nnyin ikabare itie ke ndueidem inyuñ inyene isio-isio edu uwem ke ido Abasi.

Ke Edikem Ini Mbeñeidem

Mfin akpana edi ini eke ebehede nnyin. Mfin edi uesn mbeñeidem mfin edi usen erinyaña. Ekpetie didie ye afo edieke mfin ekpedide akpatre usen ke ererimbot?

Idaha emi edi ini eke ọfonde ndiyom erifen nto Abasi, kpa ini eke Abasi edinyimede fi. Iko Abasi ọdọhọ ete yak afo onim enye ke akpanikọ. Abasi eyenyime fi, ufan anam idiok-ńkpọ, anditiene-Christ emi ebitde ke mbuotidem, owo mfiak-edem, obukpo ye mbit-mbit owo ufok-Abasi, edieke afo akabarede esit.

Abasi ke okokot. Edieke edikopde Uyo Abasi kusọn esit, edi fiak nyọn ufok tiene ima Abasi nyuñ beñe idem bet akpatre usen oro.

MME MBUME

- 1 Anie ọnọ nnyin ntọt ete ke edifiak edem mkpọn mbuotidem eyedu ke ukperedem ini?
- 2 Nso ke mmọ emi efiakde edem ekpọn mbuotidem eda ekpuhọre ye akpanikọ?
- 3 Nso itibe inọ ekpri uyo esit mmọ eke ema ekekpọn mbuotidem?
- 4 Nte odu ke otu se Abasi obotde emi Abasi edisinde? Didie ke edifiak eda mmọ?
- 5 Nso ke enyene ndisin?
- 6 Tiñ ikọ emi ọyọhọ: “Edi uteñe Abasi ọwọrọ udori ke kpukpru usuñ...”
- 7 Ini ewe ke ndiok-eyo edidi?
- 8 Siak enyiñ mme idiọnọ 19 emi owutde ndiok-eyo nte ema ekebemiso etiñ ke ibuot ukpep-ńkpọ mfin emi.